



FASNACHT 1969

---

Sujet:

## Hau dr Lukas!

e Fasnachtszedeli vom  
PFLUDERI-ASYL



Aber Herr Regierigsrot,  
du weisch-es doch, dass das nit goht,  
eso wird nit, me darf doch bitte,  
e-n-Ehrekompagnie abschritte,  
ohni Cravatte,  
das wirft Schatte,  
mit offenem Krage,  
du hesch e Mage,  
d'Händ in de Segg,  
wie-n-e Wegglibegg,

und denn die famose  
Handorgelehose,  
fascht eso ächt,  
wie dr Ueli als Knächt  
zum Gligg, mer wänn's hoffe,  
hesch dr Schlitz nit no offe,  
das hätt grad no gfählt,  
denn wurd'sch nimme gwählt,  
was hesch au dänggt?  
hesch gmeint s'wird dr gschänggt?  
jetz hesch dr Mais,  
in gwise Kreis,  
s'nägschtmol griegsch nimme  
sofyl Stimme,  
muesch aber nit gryne,  
dä Verluscht goht no yne,  
mir gehn mit dir einig,  
s'isch au unseri Meinig,  
nit uff d'Schale kunnt's a,  
im Grind muess me's ha!

---

An dr Ladärne-Usstellig am Zyschtig in dr Muschtermäss isch  
au unser Lämppli usgestellt. D'Usstellig isch offe vom Nyni am  
morge bis z'nacht am Elfi.

---